

ಪೌಲನು ಫಿಲಿಪ್ಪಿಯವರಿಗೆ ಬರೆದ ಪತ್ರಿಕೆ ಪೌಲನೆ ಫಿಲಿಪ್ಪಿವಾಳಾನ ಲೀಖ್ಯೋತೆ ಚಿಟ್ಟಿ ಮಾಲುಮ್ ಕರಾನು

ಪೌಲನೆ ಕ್ರಿಸ್ತನಿ ಪೈದಾಖ್ತೆನ ವಾರ್ ಖ್ವಮಾರ್ 61 ನು ವರಖ್ತೆಮ ಆ ಚಿಟ್ಟಿ ಫಿಲಿಪ್ ಖ್ವಯೇರ್ನ್ ವಿಶ್ವಾಸಿನ ಲೀಖ್ಯೋತೆ, ಆ ವೇಳ್ಕ ಯೊ ಘಣೇಡಿ ರೋಮ್‌ನ ಖ್ವಾರ್ಕೊಟ್‌ಮ ಥೊ. 1:13 ಆ ಚಿಟ್ಟಿ ಫಿಲಿಪ್ಪಿ ಖ್ವಯೇರ್‌ಮ ಛಾತೆ ಸಬೇನ ಲಿಖ್ತಿರ್ನ್. ಅಪೊಸ್ತಲನು ಕಾಮ್ ಪುಸ್ತಕ್‌ಮ ಫಿಲಿಪ್ಪಿನಿ ಬಾರೇಮ ಅಪ್ಪೆ ಥೋಡಿ ವಾತೇವ್ನ್ ಮಾಲುಮ್ ಕರೆಚಾಯ್. ಫಿಲಿಪ್ಪಿ ಖ್ವಯೇರ್ ಮೆಸೆಡೋನಿಯ ತಬರ್‌ಖಾನು ರಾಜಧಾನಿ ಹುಯಿರ್ನ್. ಆ ಸಭೆ ಮೆಸೆಡೋನಿಯಮ ಭಂದೈರ್ನ್ ಪಹಿಲಿ ಸಭೆ ಹುಯಿರ್ನ್. ಪೌಲಬಿ ಸೀಲಾನೆ ಆ ಸಬೆನ ಶುರುಕರ್ನ್ ಅಜ್ಜು ಹಿಜ್ಜಾಧಾತೆ ತದೆ ಏಕ್ ದನ್ ಖ್ವಾರ್ಕೊಟ್‌ಮ ಘಲ್ತೆರ್ನ್ ಅಪೊ 16.

ಆ ಚಿಟ್ಟಿ ಲಿಖಾನ ಪೌಲನಿ ಕೈಯೇಕ್ ಉದ್ದೇಶ್ ರ್ವೇವ್ಣಕರಿ ದೆಖಾವಸ್ ಇನೆ ಆ ಮೋಕಾನ ಇವ್ಣೆ ಖ್ವಾರ್ಕೊಟ್‌ಮ ಥಿಯೈಕರಿ ಖ್ವಮ್‌ಜಿನ್ ಇವ್ಣೆ ಮೋಕ್‌ಲ್ಯುತೆ ಇನಾಮ್‌ಖ್ವಾಜೆ ಸಬೆನ ಧನ್ಯವಾದ್ ಬೋಲಾನ ಉಪಯೋಗ್ ಕರಿಲೇಸ್ 4:10-19 ಇನೆ ಖ್ವಾರ್ಕೊಟ್‌ಮ ಥೂತೆ ಇವ್ಣಿ ಹಾಲತ್ನಿ ಬಾರೇಮ ಬೋಲಸ್ ಅಜ್ಜು ತಿಮೊಥೆಬಿನ್ ಎಪಪ್ರೊದಿಕನ ಸಬೆನ ಮಾಲುಮ್ ಕರ್ತೆವತಾಳಸ್ 2:19-30 ಅಮ್ ಇವ್ಣೆ ಇವ್ಣುನ ಸ್ವಾಗತ್ ಕರಾನಿಮತ್ ಅಜ್ಜು ಇವ್ಣಿ ಗಲ್‌ಥಾನ ಮರ್ಯಾದಿ ಆವಾನಿಫೋಣಿ ಬೋಲಸ್.

ಕಾಡಿದೇಖೊ

- 1 ಪೌಲನೆ ಫಿಲಿಪ್ಪಿನಿ ಸಬೇನ ಖ್ವಲಾಮ್ ಕರ್ತೊಹುಯಿನ್ ಶುರುವಾತ್ ಕರಸ್. 1:1-2
- 2 ಇನಕೇಡೆಥು ಯೊ ಇನಿ ರ್ವಾನಿ ಬಾರೇಮ ಥೋಡು ಸಂದೇಶ್ ವಾಟಪಾಡಿಲೇಸ್ ಅಜ್ಜು ಇನಥೂತೆ ಥೋಡಿ ತರಖ್ತೆ

ವಾಟಪಾಡಿಲೆಸ್. 1:3—2:3

3 ಇನಕೇಡೆಥು ಯೊ ಕ್ರಿಸ್ತನು ವಿಶ್ವಾಸಿನ ಜಿವ್ವಾನಖ್ವಾಜೆ ಘಣೇಥಿ
ಘಣು ಕಾಮಕರ್ತೊಹುಯಿನ್ ವಾಟ್‌ವತಾಳ್ತೊ ಗಯೊ 3:1—
4:9

4 ಪಾಲನೆ ಫಿಲಿಪ್ಪಿ ಸಬೇನ ಇವ್ಣೆ ಮೋಕ್‌ಲ್ಯತೆ ಇನಾಮ್‌ಖ್ವಾಜೆ
ಧನ್ಯವಾದ್ ಬೋಲಿನ್ ಇನಿ ಖ್ವಲಾಮ್ನ ಬೋಲ್ತೊಹುಯಿನ್
ಚಿಟ್ಟಿನ ಖತಮ್ ಕರಸ್ 4:10-23

1 ಕ್ರಿಸ್ತ ಯೇಸುನ ದಾಸ ಹುಯಿರಾತೆ ಪಾಲಬಿ ತಿಮೊಥೆ, ಫಿಲಿಪ್ಪಿ
ಖ್ವಿಯೇರ್ನ್ ವಿಶ್ವಾಸಿಖ್ವಾರಾನ ಅಜ್ಜು ಇವ್ಣ ಜೋಡೆ ರ್ಹವಾಳನ ಸಬೇನ
ಮೋಟಾನ ಅಜ್ಜು ಮದತ್ ಕರವಾಳನ ಲೀಖಾನು ಶಾತ್‌ಕತೊ,

2 ಬಾ ದೇವ್‌ಥಿಬಿ ಪ್ರಭು ಯೇಸು ಕ್ರಿಸ್ತಥಿಬಿ ತುಮುನ ವಾರ್‌ಖೊಬಿ
ಶಾಂತಿಬಿ ಮಳಾದೆ.

ಇನ ಪಥವಾಳನಖ್ವಾಜೆ ಪಾಲನಿ ಪ್ರಾರ್ಥನೆ

3 ತುಮುನ ಯಾದ್ ಕರಾನಿ ಖ್ವಾರಿ ವಖ್ವತ್‌ಮ ಮೆ ದೇವ್ ಧನ್ಯವಾದ್
ಕರುಸ್,

4 ಮೇ ತುಮಾರಖ್ವಾಜೆ ಪ್ರಾರ್ಥನೆ ಕರಾನಿ ಅಖ್ವೀಸ್ ವಖ್ವತ್‌ಮಾಬಿ
ಶಂತೋಖ್ಲೋಸ್ ಪ್ರಾರ್ಥನೆ ಕರಾವಾಳೊ ಹುಯಿರ್ಲ್ಹೋಸ್.

5 ಶನಕತೊ ತುಮೆ ಪಹಿಲೆಥ ಹಮ್ಮೆಲಗುಬಿ ಸುವಾರ್ತೆನು
ಬೋಧನೆಮ ಭಾಗ್‌ರ್ಹವಾಳ ಹುಯಿರ್ಲ್ಹಾಸ್.

6 ಆ ಅಲ್ಪುಕಾಮ್ನ ತುಮಾರಮ ಶುರುಕರ್ಯೊತೆ ದೇವ್ಣೆ ಇನ
ಚಲಾವೊಹುಯಿನ್ ಯೇಸು ಕ್ರಿಸ್ತ ಆವಾನಮಹಿ ಪೂರ ಕರ್ಶೆಕರಿ
ಮನ ಭರೋಖೊಲ್ಲಾ.

7 ತುಮಾರಿ ಬಾರೇಮ ಮನ ಅಮ್ ಬೋಲಾವಸ್ತೆ ಖ್ವಾಚುಸ್.
ಶನಕತೊ ಮೆ ಬಂದಿ ಹುಯಿರ್ಲ್ಹವಾನಿ ವಖ್ವೆತೆಬಿ, ಸುವಾರ್ತೆನಿ
ಬಾರೇನು ಆಡ್‌ಫೇಡ್‌ಮಾಬಿ ತುಮೆಖ್ವಾರು ಮಾರಜೋಡೆ ದೇವ್ಣಿ
ವಾರ್‌ಖ್ವಾಮ ಭಾಗ್‌ವಾಳ ಹುಯಿರ್ಲ್ಹಾಸ್ ಕರಿ ತುಮುನ ಮಾರ ದಿಲ್ಮ
ರಾಖಿಮ್ಲೋಸ್.

8 ಕ್ರಿಸ್ತ ಯೇಸುನ ಛಾತೆ ಗೋರ್ಥೀಸ್ ತುಮಾರ ಹರೇಕ್ಷ ಖ್ವಾಜೆ ಕೆತ್ರೇಕ್ಚಿ ತರ್ಖುಕರುಸ್. ಅನ ದೇವಸ್ ಸಾಕ್ಷಿ.

9 ಅಜು ತುಮಾರಿ ಪ್ಯಾರ್ ಅಜೂಬಿ ಜಾಖ್ವತ್ ಭಡೆನ್ ಪೂರ ಅಕ್ಕಲ್‌ಥೀಬಿ ಖ್ವಯಾಲ್‌ಥಿ ಮಳಿರ್ದವಾಳ ಹುಯಿರ್ದೇವ್ಣಕರಿ ಮೆ ತುಮಾರಖ್ವಾಜೆ ಪಾರ್ಥನೆ ಕರುಸ್.

10 ಅಮ್ ಮಹಾನ್ ಕಾಮ್‌ಖ್ವಾರು ಖಿವುಕರಿ ಬೋಲಾನು ತುಮೆ ಪರ್ಪಾವಾಳ ಹುಯಿರ್ದೇಣು ಕರೀಬಿ ಬಿಜು ಕ್ರಿಸ್ತ ಆವಾನ ದನ್ಮ ತುಮೆ ಪರಿಶುದ್ಧೀಬಿ ದೋಷ್‌ಕೊಂತೇಬಿ ರಕ್ಷೆಶು.

11 ಯೇಸು ಕ್ರಿಸ್ತಮ ಛಾತೆ ಅಛ್ಫುಗುಣ್‌ನ ಭರೈರ್ದವಾಳ ಹುಯಿನ್ ರ್ದೇವ್ಣಕರಿ ದೇವ್ಣ ಮಹಿಮೆ ಅಜು ದನ್ಯವಾದ್‌ನ ದೇವ್ಣಕರಿ ಬಿಂತಿಕರಿಲೇವುಸ್.

ಜಿವಾನಖ್ವಾಜೆ ಕ್ರಿಸ್ತ

12 ಬೈಯೇ ಭೇನೆವೊ, ಮನ ಹುಯೂತೆ ಅಖ್ವಾಬಿ ಸುವಾರ್ತೆನ ಭಡಾವನ ಮದತ್ ಹುಯಿಕರಿ ತುಮೆ ಮಾಲುಮ್ ಕರಿಲೇವ್ಣಕರಿ ಮೆ ಹರ್‌ಮ್ನುಸ್.

13 ಕಿಮ್‌ಕತೊ ಮೆ ಜೇಲ್‌ಮ ರ್ದವಾನು ಕ್ರಿಸ್ತನ ಖ್ವಾಜೆಸ್ ಕರಿ ಮಹೇಲ್‌ನ ಕಾಪ್ಲಿ ಕರಾವಾಳ ಖ್ವಾರನಾಬಿ ಬಿಜುಖ್ವಾರನಾಬಿ ಮಾಲುಮ್‌ಪಡ್ಕು.

14 ಆ ನಾಹುಯಿನ್ ಬೈಯೇ ಭೇನೆಮ ಜಾಖ್ವತ್ ಅದ್ಮಿ ಮಾರಿ ಭಂದಣ್‌ಥೀಸ್ ಪ್ರಭುಮ ಭರೋಖ್ವಾಥಿ ದೇವ್ಣಿ ವಚನ್ನ ಡರ್‌ಕೊಂತೆ ಬೋಲಾನ ಅಜೂಬಿ ಘಣು ಭಾಲಿ ಲೀರಾಖ್ವುಸ್.

15 ಥೋಡುಜಣು ಪೇಟೊ ಬಳಾಪೊಕರಿನ್ ದಿಲ್ಮ ಕಚ್ಚರ್ ರಾಖವಾಳ ಹುಯಿರ್ದೇಸ್. ಕತೋಬಿ ಅಲಕ್ ಥೋಡುಜಣು ಅಛ್ಫಿ ಉದ್ದೇಶ್‌ಥಿ ಕ್ರಿಸ್ತನಿ ಸುವಾರ್ತೆನ ಬೋಲಿವತಾಳಸ್.

16 ಅವ್ಣೇತೊ ಮೆ ಸುವಾರ್ತೆನಿ ಬಾರೇಮ ಜುವಾಬ್ ಬೋಲಾನಖ್ವಾಜೆ ಹಜ್ಜಾ ಮೆ ಘಲ್ಟೆರ್ದೇಸ್ ಕರಿ ಮಾಲುಮ್ ಕರಿನ್ ಪ್ಯಾರ್‌ಥಿ ಪ್ರಚಾರ್ ಕರುಕರಸ್.

17 ಧೋಡುಜ್ಜಣು ಇಮಾಂಧಾರಿನಖ್ವಾಜೆ ಕಾಹೆ, ಶೋಂತ್ ಆಖ್ವಾನ್ ಖ್ವಾಜೆಸ್ ಕ್ರಿಸ್ತನ ಪ್ರಚಾರ್ ಕರಾಸ್. ಕತೋಬಿ ಧೋಡುಜ್ಜಣು ಮೆ ಬೇಡಿ ಘಲ್ಯೆನ್ ಕೋಂಡೈರವ್ವಾನಿ ವಖ್ವೆತೆ ಮನ ಖ್ವಾಪ್ಪಿ ಜ್ಞಾಖ್ವತ್ ಕರ್ನುಕರಿ ಸೋಚ್ಚು.

18 ಇವ್ಳಿ ಉದ್ದೇಶ್ ಶಾತಸ್ ಹುಯಿರವ್ವಾದೆ, ರಗಾವಾಧಿ ರವ್ವೊ ನತರ್ ಖ್ವಾಚೇಧಿ ರವ್ವೊ ಯೋ ಮನ ಮುಖ್ಯಕಾಹೆ. ಕ್ರಿಸ್ತಯೇಸುನ ಬಾರೇಮ ಬೋಲಿವತಾಳು ಕರುಕರಾತೆಸ್ ಮನ ಖುಷಿ. ಅಜ್ಜು ಅಗ್ಗಳೆಬಿ ಖುಷಿ ಕರುಸ್.

19 ಶನಕತೊ ತುಮಾರಿ ಬಿಂತಿಧಿಬಿ ಅಜ್ಜು ಯೇಸು ಕ್ರಿಸ್ತನು ಆತ್ಮನಿ ಮದತ್‌ಧೀಬಿ ಆ ಹೈರುತೆ ಮಾರು ಛುಟ್ಕಾರ್‌ನ ಶುಲ್ಪ ಉಷೆಕರಿ ಮಾಲುಮ್ ಛಾ.

20 ಕಿಮ್‌ಕತೊ ಮೆ ಖಿವಿ ವಿಚಾರ್‌ಮಾಬಿ ಖ್ವಮಾಯೊಕೊಂತೆ ಕೆದೇಬಿ ರವ್ವಾನಿತರಸ್ ಹಮ್ಮೇಬಿ ಜಿನು ಘಣು ಭಾಲಿಧಿ ಛೂತೆ ಇನಖ್ವಾಜೆ ಜಿವ್ವೊ ರವ್ವಿಯೊತೋಬಿ ಬರೋಬರಸ್ ನತರ್ ಮರಯೊತೋಬಿ ಬರೋಬರಸ್ ಮಾರಿ ಶರೀರ್‌ಧಿ ಕ್ರಿಸ್ತನ ಮಹಿಮೆ ಹುವಾದೆಕರಿ ಮಾರಿ ಮೋಟಿ ಹರಖ್ವ್ ಹುಯಿರವ್ವೀಸ್, ಇಮ್ಮುಸ್ ಉಷೆಕರಿ ಭರೋಖ್ವೊ ಛಾ.

21 ಮನತೊ ಬಚಾನುಕತೊ ಕ್ರಿಸ್ತಸ್, ಮರಾನು ನವ್ವೋಸ್.

22 ಅಮ್ ಶರೀರ್‌ಮ ಬಚಾನುಸ್ ಫಲ್ ದೈವಾನು ರವ್ವಯೊತೊ, ಅನಾಮಾಥು ಖಿವು ಚೂಣಿಲೇವ್ವಕರಿ ಮನ ಮಾಲುಮ್ ಕೊಪಡುಕರಾನಿ.

23 ಆ ಭೇನ ಇಚ್‌ಮ ಖ್ವಪ್‌ಡಿರವ್ವೊಸ್, ಹಜ್ಜಾಡ್ರು ನಿಕ್ಕಿನ್ ಕ್ರಿಸ್ತ ಯೇಸುನಿ ಜೋಡ್ ರವ್ವೀವ್ವಕರಿ ಬೋಲಾನುಸ್ ಮಾರಿ ಆಖ್ವ್ ಹುಯಿರವ್ವೀಸ್, ಯೊ ಘಣು ಅಲ್ಪುಸ್ ಹುಯಿರವ್ವೀಸ್.

24 ಕತೋಬಿ ಮೇ ಬಿಜ್ಜೂಬಿ ಶರೀರ್‌ಮ ಜಿವ್‌ಕರಾನು ತುಮಾರಖ್ವಾಜೇಧಿ ಘಣು ಜ್ಞರೂರತ್ ಛಾ.

25 ಇನಖ್ವಾಜೆ ತುಮುನ ವಿಶ್ವಾಸ್ ಭಡೀನ್ ಶಂತೋಖ್ವಾಧಿ ರವ್ವಾನಖ್ವಾಜೆ ಮೇ ಬಚಿರವ್ವೀನ್ ತುಮಾರ ಅಖ್ವಾಸ್ನಿ ಜೋಡ್ ರವ್ವೀಷ್

ಕರಿ ಘಟ್ ವಿಶ್ವಾಸ್ ಛಾ.

26 ಅಮ್ ಮೆ ಫಾಫೊಫರಿ ಆವಾಧಿ ತುಮೆ ಕ್ರಿಸ್ತ ಯೇಸುನ ಗಳೊಡ್ಡೆ ಮುಷಿ ಕರಾನ ಮಾರೇಧಿ ಘಣಿ ಹುಮ್ಮಖ್ವಾರ್ಶಿಶೆ.

27 ಕಿಮ್‌ಬಿ ಕ್ರಿಸ್ತನಿ ಸುವಾರ್ತೆನ ಲ್ಹಾಯೇಕ್‌ಹುಯಿನ್ ಚಾಲಿಲೆವೊ. ತದೆ ಮೆ ಐನ್ ತುಮುನ ದೇಖೊತೋಬಿ ಚಾಲಸ್, ದೂರ್ ರ್ಶ್ವಿನ್ ತುಮಾರಿ ಖಬರ್‌ನ ಖ್ವುಮ್‌ಜೊ ಚಾಲಸ್, ತುಮೆ ತುಮಾರ ವಿರೋದಿನ ಖಿವಿ ವಿಚಾರ್‌ಮಾಬಿ ನಾಡರ್‌ತ್ಲೆ ಏಕ್ ದಿಲ್‌ಧಿ ಘಟ್‌ಧಿ ಭೀರಿನ್ ಸುವಾರ್ತೆಮ ರಾಖ್ಯತೆ ವಿಶ್ವಾಸ್‌ಖ್ವಾಜೆ ಏಕ್ ಮನ್‌ಧಿ ಲಡವಾಳ ಹುಯಿರ್‌ಲ್ಹಾಸ್‌ಕರಿ ಮೆ ಲ್ಹಾವ್ಸ್.

28 ತುಮೆ ತುಮಾರ ವಹೇರ್‌ಲ್ಹಾಧಿ ನಕೊ ಡರೊ ಕೆದೇಬಿ ಭಾಲ್‌ಧಿ ರ್ಶ್ವೊ, ಅಜ್ಜು ಅನ ಸಬೂತ್ ಕರೂಸ್ತಿ ವಿರೋದಿನ ನಾಶ್ ಅಜ್ಜು ತುಮುನ ರಕ್ಷಣೆ. ಶನಕತೊ ಆ ದೇವ್‌ಧಿಸ್ ಹುಯಿರ್‌ಲ್ಹಾಸ್.

29 ಕ್ರಿಸ್ತನವಾಳಾನ ಹಾತ್ ಫೈಲೈನ್ ದೈವಾಳ ಹುಯಿರೇವೊ. ಕ್ರಿಸ್ತಪರ್ ವಿಶ್ವಾಸ್‌ರಾಖಾನು ಖಲಿ ಕಾಹೆ ಇನಖ್ವಾಜೆ ವದೇಖ್‌ಪಡಾನುಬಿ ಅಟ್ಫಿ ವರ ಮಳಿರ್‌ಲ್ಹಾಸ್.

30 ಅಮ್ ತುಮೆ ಮಾರಮ ದೇಖ್ಯಾತೆ ಯೋಸ್ ಲಡ್ವಾನು ತುಮುನಾಬಿ ಛಾ.

2

ಕ್ರಿಸ್ತಮ ಹೇಟುಹುವಾನು ಅಜ್ಜು ಭಡ್‌ಪಣ್

1 ಕ್ರಿಸ್ತಮ ಪವಿತ್ರಾತ್ಮಧಿ ಮಳಿನ್ ರ್ಹವಾನು, ಪ್ಯಾರ್‌ನ ಸಮಾಧಾನ್, ಅಜ್ಜು ಗೋರ್‌ನಿ ದಯಾಧಿ ಏಕ್‌ಧಿಏಕ್ ಹುಮ್ಮಖ್ವಾವಾಳ ಹುಯಿರ್‌ಶಿವೊ.

2 ತುಮೆ ಅಖ್ವು ಎಕ್ಕ್‌ಸ್ ದಿಲ್‌ವಾಳ ಹುಯಿನ್, ಎಕ್ಕ್‌ಸ್ ಪ್ಯಾರ್‌ವಾಳ ಹುಯಿನ್, ಏಕ್‌ಧಿಏಕ್ ಮಳಿನ್ ರ್ಹವವಾಳ ಹುಯಿನ್ ಅಜ್ಜು ಎಕ್ಕ್‌ಸ್ ಶುಶತ್ ರಾಖವಾಳ ಹುಯಿರಿನ್ ಮಾರಿ ಶಂತೋಖ್‌ನ್ ಪೂರ ಕರೊ.

3 ಇನುಯೋ ಭಡಾನಖ್ವಾಜೆ ರ್ವವೊ, ಶಿಕ್ಕೊ ಲ್ಯವಾನಖ್ವಾಜೆ ಶಾತ್ಪಿ ನಾಕರ್ನ್ವತೆ, ಹರೇಕ್ ಭಣುಬಿ ಹೇಟು ಹುವಾಳಹುಯಿನ್ ಬಿಜೇಕ್ ಭಣಾನ ಇನೇಥಿಬಿ ಊಚೊಕರಿ ದೇಖಾದೆ.

4 ತುಮಾರಮ ಹರೇಕ್‌ಭಣೊ ಖಲಿ ಇವ್ಣ ಅಲ್ಫಾಸ್ಸು ನಾ ದೇಕ್ಕುತೆ ಬಿಭಾನು ಅಲ್ಫು ಹುವಾನುಬಿ ದೇಖಾದೆ.

5 ಕ್ರಿಸ್ತ ಯೇಸುಮ ಥೋತೆ ದಿಲ್ ತುಮಾರಮಾಬಿ ರ್ವವಾದೆ.

6 ಯೋ ದೇವ್‌ನೊ ರೂಪ್‌ವಾಳೊ ಹುಯೊ, ಕತೋಬಿ ದೇವ್ನಿಸ್ವರೂಪ್ಪ ಬರೋಬರ್ ರ್ವಯುತೋಬಿ ಮಹಾನ್ ಪದವಿನ ಮ್ಹೇಲುಕೊಯ್ತಿಕರಿ ಬೋಲಿನ್,

7 ಇನುಯೋಸ್ ಖಾಲಿ ಕರಿಲೀನ್ ದಾಸನು ರೂಪ್‌ನ ಫೇರಿಲಿನ್ ಅದ್ನಿನಿಘೋಣಿ ದೆಖ್ಲಿಲಿದೊ.

8 ಇನೆ ಇನುಯೋಸ್ ಹೇಟು ಹುಯಿನ್ ಮರಣ್ಣಖ್ವಾಜೆ ಕತೊ ಶಿಲ್‌ಬೇನಿ ಮರಣ್ಣಾಬಿ ಛೇಮಯೆತ್ರಿ ಹೇಟೊ ಹುಯೊ.

9 ಅನಖ್ವಾಜೆಸ್ ದೇವ್ಣೆ ಇನ ಘಣು ಊಚೊ ಪಾಡ್ಯೊ ಅಜು ಅಖ್ವಾ ನಾಮ್‌ಥಿಬಿ ಊಚು ಹುಯಿರ್ನ್ವತೆ ನಾಮ್ ಇನ ದಯ ಕರಿರಾಖ್ಯೊಸ್.

10 ಇನಖ್ವಾಜೆ ಸೊರ್ಗ್ ಮರಣ್ ಪಾತಾಳ್ ರ್ವವವಾಳು ಖ್ವಾರುಸ್ ಯೇಸುನ ನಾಮ್ ಗುಡ್‌ಘ್ಯಮೇಟೆಹುಯಿನ್ ಆಡ್‌ಪಡೆನ್,

11 ಬಾ ಹುಯಿರ್ನ್ವತೆ ದೇವ್ನಿ ಮಹಿಮೆನ ಖ್ವಾಜೆ ಯೇಸು ಕ್ರಿಸ್ತನ ಪ್ರಭುಕರಿ ಹರೇಕ್ ಅದ್ನಿ ಕಬೂಲ್ ಕರ್ಶೆ.

ಜಗತ್‌ಮ ಉಜಾಳನಿತರ ಉಜಾಖ್ಯಾದ್ಯವಾನು

12 ಅಮ್ ರ್ವವಾಪರ್ ಮಾರ ಪ್ಯಾರ್‌ನ ದೋಸ್ತಿವೊ, ತುಮೆ ಮಾರಿ ವಾತೇನ ಕೆದೇಬಿ ಪಾಡಿಚಾಲ್ಯತೆ ತಿಮ್ ಹಮ್ಕೇಬಿ ಪಾಡಿಚಾಲೊ. ಮೆ ತುಮಾರಮ ರ್ವವಾನಿವಖ್ವಾತೆಸ್ ಖಲಿಕಾಹೆತೆ, ಮೇ ನಾ ರ್ವವಾಮಾಬಿ ಘಣು ಭಾಖ್ತಾ ದಿಲ್ಮಡರ್‌ಥಿ ಕಾಪವಾಳ ಹುಯಿನ್ ತುಮಾರಿ, ತುಮಾರಿ ರಕ್ಷಣೆನ ಲೀಲೆವೊ.

13 ಶನಕತೊ ದೇವಸ್ ಇನಿಮರ್ಜಿನ ಚಲಾವ್ವಕ್ಕರಿ ತುಮಾರಮ ಉದ್ದೇಶನಾಬಿ ಅಜ್ಜು ಕೋಶಿಶನ್ ಬಣಾವವಾಳೊ ಹುಯಿರೋಸ್.

14 ಭಣಕ್ಕುನಾತೇಬಿ, ಆಡಫೇಡ್ ನಾ ಬೋಲ್ವುತೆ ಖ್ವಾರು ಕರೊ.

15 ಅಮ್ ತುಮೆ ದೋಷ್ನಾರ್ವಾಳೆಬಿ ಅಜ್ಜು ದೇವ್ವ ಧೋಬೆಡಾದಿಲ್ವ ಲಡ್ಡಹುಯಿನ್ ಮೋಂಡ್‌ಖ್ವಯಾಲ್‌ನ ಅಜ್ಜು ಪಾಪ್‌ಮ ರ್ವಾಳ ಜಗತ್ವ ಅದ್ವಿವೊನ ಬೀಚ್ಚ ಮೈಲುಕೊಂತೆ ದೇವ್ವ ಲಡ್ಡ ಹುಯಿರ್ವ್ವಿಶು.

16 ಅವ್ವ ಮಹಿ ತುಮೆ ಹರೇಕ್‌ನಾಬಿ ಜಾನ್‌ರ್ವಾನು ವಚನ್ನ ವತಾಳವಾಳ ಹುಯಿರ್ವ್ವಿನ್, ಜಗತ್‌ಮ ಝಮ್ನಾನ ಶುಕ್ಕರ್‌ನಿಮತ್ ದೆಖಾವ್‌ಶು. ತುಮೆ ಅಮ್‌ಚಾಲ್ಯಾತೊ ಮಾರಿ ಸೇವೆ ಬಿಣ್‌ಫಾಯಿದಾನು ಕಾಹೆ, ಮೇ ವದೇಖ್ವಪಡ್ವೊತೆ ಫಾಯಿದೋಸ್‌ಕರಿ ಬೋಲಾನಿ ಖ್ವಾರ್ವಿ ಕ್ರಿಸ್ತಾನ ದನ್ಮ ಮನಮಳ್‌ಷೆ.

17 ತುಮಾರಿ ವಿಶ್ವಾಸ್ ಕರಿ ಬಲೀನ ಕಾಣ್ಕೆಮ ದೇವ್ವ ಮೇ ಅರ್ಪಣ್‌ಕರಾಮ ಮಾರ ಲೋಹಿನ ವವ್ವಾಡನಿತರ ಹುಯುತೋಬಿ ಮನ ಖುಷಿ, ತುಮಾರ ಜೋಡೇಬಿ ಶಂತೋಖ್ವಪಡುಸ್.

18 ಇಮ್ಯಸ್ ತುಮೇಬಿ ಶಂತೋಖ್ವ ಪಡೊ, ಅಜ್ಜು ತುಮೆ ಮಾರ ಜೋಡೇಬಿ ಶಂತೋಖ್ವ ಕರೊ.

ತಿಮೊಥೆ ಅಜ್ಜು ಎಪಫ್ರೊದಿ

19 ಕತೋಬಿ ಪ್ರಭು ಯೇಸುನಿ ಮರ್ಜಿ ಹುಯೂತೊ ಮೆ ತಿಮೊಥೆನ ಜಲ್ಲಿದಿ ತುಮಾರಕನ ಮೋಕಲ್ವಕ್ಕರಿ ಭರೋಖ್ವೊ ಲ್ಲಾ. ಇನೇಥಿ ತುಮಾರಿ ಬಾರೇನಿ ಸಮಾಚಾರ್‌ಖ್ವಮ್‌ಜಿನ್ ಮೆ ಭಾಲ್ ಹುಯಿಶ್.

20 ಇನಿನಿತರ ತುಮಾರು ಅಲ್ಪುರ್ವಾನಿ ಬಾರೇಮ ಘಣು ಛುಟಾದಿಲ್‌ಥಿ ವೇಚ್‌ಣೆ ಕರಾಸ್ತೆ ತಿಮ್ ಮಾರ ಜೋಡ್ವಿಬಿಜ್ಜು ಖಿವೊಬಿ ಕೊಯ್ವಿ.

21 ಅಖ್ವುಜ್ಜಣು ಇವ್ವ ಕಾಮ್‌ಪರ್ ಮಗನ್ ರ್ವೀಸ್ ಪಣ್ಣಿ ಯೇಸು ಕ್ರಿಸ್ತನ ಕಾಮ್‌ಪರ್ ಮನ್‌ಲಗಾಡಕೊಯ್ವಿ.

22 ಕತೋಬಿ ತಿಮೊಥೆನ ಯೋಗ್ಯತೆನ ತುಮೆ ಮಾಲುಮ್ ಕರಿರಾಖ್ಯಸ್. ಛಿಯೊ ಬಾನಿ ಜೋಡ್ಡ ಕಿಮ್ಮಿ ತಿಮ್ಮಸ್ ಇನೆ ಮಾರ ಜೋಡ್ಡ ಸುವಾರ್ತೆನ ಪೈಲಾವನಖ್ವಾಜೆ ಸೇವೆ ಕರಿರಾಖ್ಯೋಸ್ ಕರಿ ಬೋಲಾನು ತುಮುನ ಮಾಲುಮ್‌ಲ್ಲಾ.

23 ಇನಖ್ವಾಜೆ ಮಾರಿ ಬಾರೇಮ ಫಾಲುಕರಾತೆ ಕಿಮ್‌ಹುವಾಸ್ಕಿ ಇನ ಖ್ವಮ್‌ಜೊತೊ ತದೇಸ್ ತಿಮೊಥೆನ ತುಮಾರಕನ ಮೋಕ್ಲಾನ ಆಖ್ವ್ ಕರುಸ್.

24 ಆನಾಹುಯಿನ್ ಮೇ ಜಿನು ಒಗ್ಗೀಮಾಸ್ ಐಶ್‌ಕರಿ ಪ್ರಭುಮ ಘಟ್‌ಥಿ ವಿಶ್ವಾಸ್ ಕರಿರಾಖ್ಯೋಸ್.

25 ಮಾರಿ ಜರೂರತ್ವ ಕಾಡಾನಖ್ವಾಜೆ ತುಮೆ ಮೋಕ್‌ಲ್ಯಥಾತೆ, ಮಾರೊ ಬೈ ಜೋಡ್ಡೊ ಸೇವಕ್‌ಬಿ, ಜೋಡ್‌ನೊ ಶಿಪಾಯಿಬಿ ಹುಯಿರರ್ಪೊಸ್ತೆ ಎಪಪ್ರೋದೀತ್‌ನ ತುಮಾರಕನ ಮೋಕ್ಲಾನು ಜರೂರತ್ ಕರಿ ಲ್ಯಾಹುಸ್.

26 ಇನೆ ತುಮಾರಿ ಬಾರೇಮ ತಖ್ವುಕರ್ತೊಥೊ ಅಜು ಯೊ ಜಾನ್ನ್ ಅಛ್ಚುಕೊಂತೆ ಖಬರ್‌ನ ತುಮೆ ಖ್ವಮ್‌ಜ್ಯಾತೆ ಇನಖ್ವಾಜೆ ಯೊ ದುಖ್ ಕರಿಲಿದೊ.

27 ಯೋ ರೋಗ್ಮಪಡೀನ್ ಮರನಿತರ ಥೋತೆ ಖ್ವಾಚಾಸ್, ಕತೋಬಿ ದೇವೈಯಿನ ಗೋರ್‌ಕರ್ರೊ ಇನಾಸ್ ಖಲಿ ಕಾಹೆತೆ ಮನ ದುಖ್‌ನಪರ್ ದುಖ್ ನಾ ಆವ್ಣುತೆ ತಿಮ್ ಮನಾಬಿ ದಯಾಕರ್ರೊ.

28 ಇನಖ್ವಾಜೆ ತುಮೆ ಇನ ದೇಖಿನ್ ಪಾಲ್ಟು ಶಂತೋಖ್ವ್‌ಕರ್ನುಕರಿಬಿ ಮಾರಿ ದುಖ್ ಕಮ್ ಹೋಣುಕರೀಬಿ ಮೇ ಇನ ಘಣು ತರಖ್‌ಥಿ ಮೋಕ್ಲುಕರುಸ್.

29 ಇನಖ್ವಾಜೆ ಪ್ರಭುಮ ಬೈನಿ ಘೋಣಿ ಶಂತೋಖ್‌ಥಿ ಸ್ವೀಕಾರ್ ಕರಿಲೆವೊ. ಎಥ್ರಾನವಾಳನ ಅದ್ಮಿವ್‌ನ ಸ್ವಾಗತ್ ಕರೊ.

30 ಅಮ್ ತುಮೇಸ್ ಮನ ಕರ್ನುತೆ ಮೈಮಾನ್ಮ ಜರೂರತ್‌ನ ಭರಾನಖ್ವಾಜೆ ಇನ ಜಾನ್‌ಪರ್ಲಿ ಆಖ್ವ್‌ನ ಮೈಂದಿನ್ ಕ್ರಿಸ್ತ ಯೇಸುನಿ ಸೇವೆಮ ಮರಿಗೊ.

ಖ್ಯಾಚು ನೀತಿ

1 ಖರ್ತಿಮ ಮಾರ ಭೇನೆ ಭೈಯೇವೊ, ಪ್ರಭುಮ ಖುಷಿಕರೊ. ಪಹಿಲೆ ಖರ್ಮಾಚ್ಯಾಡ್ಯೊಧೋತೆ ಯೋಸ್ ವಾತೇವ್ ಪಾಳ್ತು ತುಮುನ ಲೀಖಾನ ಮನ ಶಾಕ್ತಿ ಬೇಜಾರ್‌ಕೊಯ್ಲಿ. ಆ ತುಮುನ ಘಟ್‌ಕರಸ್.

2 ಖರಾಬ್ ಕಾಮ್‌ಕರಾವಾಳೇಧಿ ಜತನ್ ರ್ವಾವೊ, ಖತ್ವಕರಿ ಬೋಲಿನ್ ಶರೀರಮ್ ಖ್ವಂದೊ ವ್ಹಾಡವಾಳೇಧಿ ಹೊಪಾರಿ ರ್ವಾವೊ, ಇವ್ಣೆಕುತ್‌ರಾನ್ ಸಮಾನ್ ಹುಯಿರ್ವ್ಹಾಸ್.

3 ಖ್ಯಾಚಿ ಖತ್ವ ರ್ವಾವಾಳು ಕೋಣ್‌ಕತೊ, ದೇವ್ನಿ ಆತ್ಮನಿ ಖ್ವೊಜ್‌ಧಿ ಆರಾದನೆ ಕರವಾಳು ಅಜು ಕ್ರಿಸ್ತ ಯೇಸುಮ ಖುಷಿ ಕರವಾಳುಬಿ, ಶರೀರನಿ ಆಖ್ವಾನಿ ಬಾರೇಮ ಭರೋಖ್ವೊ ಕೊಂತೇಬಿ ಹುಯಿರ್ವ್ಹಾಸ್ತೆ ಅಪ್ಪೆಸ್.

4 ಮೆತೋಬಿ ಶರೀರನಿ ಬಾರೇಮ ಭರೋಖ್ವೊ ಕರಾನಬಿ ಮೋಕ ಲ್ಹಾ. ಬಿಜು ಖಿವೊತೋಬಿ ಶರೀರನಿ ಆಖ್ವಾನಿ ಬಾರೇಮ ಭರೋಖ್ವೊ ಕರೆಭಾಯ್ ಕರಿ ಸೋಚ್ಯೊತೊ ಮೆ ಇನೇಧಿಬಿ ಜಾಖ್ವತ್ ಇಮ್ಮಸ್ ಸೋಚೆಜಾಯ್.

5 ಪೈದಹುಯಿನ್ ಆಟ್ಲ ದನ್ತ ಮನ ಖತ್ವಹುಯು, ಮೆ ಇಸ್ರಾಯೇಲ್‌ನು ಖಾನ್‌ದಾನ್‌ವಾಳೊ, ಬೆನ್ಯಾಮೀನ್ನು ಖೂಮ್‌ವಾಳೊ, ಅಫೂಟ್ ಇಬ್ರಿಯವಾಳೊ, ಧರ್ಮಶಾಸ್ತ್ರನಿ ನಿಫ್ಯಾಧಿ ದೇಖ್ಯೊತೆ, ಮೆ ಫರಿಸಾಯವಾಳೊ,

6 ಜಾತ್ನೊ ಅಭಿಮಾನ್ ದೇಖ್ಯೊತೊ ಮೆ ಕ್ರಿಸ್ತ ಸಬೆನ ಖ್ವಿತಾವವಾಳೊ, ಧರ್ಮಶಾಸ್ತ್ರನಿ ನೀತಿನ ದೇಖ್ಯೊತೊ ಮೆ ನಿರ್ದೋಷಿ.

7 ಕತೋಬಿ, ಮನ ನಫೊಹುಯಿರ್ವ್ಹಾವನು ಅಖ್ವೊಸ್ ಕ್ರಿಸ್ತನಖ್ವಾಜೆ ಲುಕ್ಲಾನ್‌ಕರಿಸ್ ಲ್ಹಾವ್ಸ್.

8 ಅತ್ರೇಸ್ ಕಾಹೆತೆ, ಮಾರೊ ಪ್ರಭು ಕ್ರಿಸ್ತಯೇಸುನ ಮಾಲುಮ್ ಕರಿಲಾವನು ಬಾರೇಮ ಘಣು ಮಹಾನ್‌ಕರಿ ಸೋಚಿನ್ ಮೆ ಅಖ್ವಾನ ಲುಕ್ಲಾನ್‌ಕರಿಸ್ ಲ್ಹಾವ್ಸ್. ಆಹ್ಯೆರೋತೆ ಇನಖ್ವಾಜೆ ಮೆ ಖ್ವಾರುಸ್ ಗುಮೈಲಿದೋತೆಬಿ ಯೊ ಅಖ್ವಾನ ಕಚ್ಕ್ರಿಸ್ ಕರಿ ಲ್ಹಾವ್ಸ್.

9 ಅನಾಮ ಮಾರಿ ಖೂಜ್ ಶಾತ್‌ಕತೊ, ಮೆ ಕ್ರಿಸ್ತಾನ ಕಮೈಕರೀನ್, ಧರ್ಮಶಾಸ್ತ್ರನು ಫಲ್ ಹುಯಿರ್ದತ್ತೆ ಶೊಂತ್ ನೀತಿಕಾಹೆ, ಕ್ರಿಸ್ತಮ ವಿಶ್ವಾಸ್‌ಕರಾಧಿ ಮಳಾತೆ ಕತೊ ಕ್ರಿಸ್ತಪರಾನಿ ವಿಶ್ವಾಸ್‌ನಿ ಆಧಾರ್‌ಧಿ ದೇವ್ ದೇಸ್ತೆ ನೀತಿನಾಸ್ ಲೀನ್ ಕ್ರಿಸ್ತಮ ರ್ಲಿವ್ಣುಕರಿ ಬೋಲಾನುಸ್.

10 ಇನಾಬಿ ಇನು ಪಾಲ್ಟು ಜಿವ್ತುಹುವಾಮ ಛಾತೆ ಶಕತ್‌ನಾಬಿ, ಇನಿ ಖ್ತಾಪ್ಣಿಮ ಭಾಗ್‌ಲ್ಯವಾನಿ ಪದವಿನ ಮಾಲುಮ್ ಕರಿಲಿನ್ ಇನಿ ಮರಣ್ಣಿ ಬಾರೇಮ ಇನೀನಿತರಸ್ ಹೋಣುಕರಿ ಬೋಲಾನುಸ್ ಮಾರಿ ಹರಖ್ ಹುಯಿರ್ದಿತ್.

11 ಅಮ್ ಮೇಬಿ ಜಿನು ಮರಿನ್ ಜಿವಿಶ್‌ಕರಿ ಮಾರಿ ಭರೋಖ್ಣೊ

ಶುಶತ್ವ ಪೊಳಾನಖ್ವಾಜೆ ದೌಡ್

12 ಅತ್ರಾಸ್‌ಮ ಮೆ ಆ ಅಖ್ವಾನ ಲೀಲಿನ್ ಪೂರ ಹುಯಿಗೊಕರಿ ಕೊಬೋಲೂನಿ. ಕತೋಬಿ ಮೆ ಶನ ಲೇವ್ಣುಕರಿ ಕ್ರಿಸ್ತ ಯೇಸು ಮನ ಧರಿಲಿದೋಕಿ ಯೋ ಲೀಲ್ಯಾವನ ಖ್ವಾಜೆ ಕೋಶಿಶ್ ಕರುಸ್.

13 ಭೇನೆ ಭೈಯೇವೊ, ಮೇತೊ ಯೋ ಶುಶತ್ವ ಪೋಚಿರ್ದಿಲ್ಯಾಸ್‌ಕರಿ ಹಮೈಲಗುಬಿ ಕೊ ಬೋಲಿರಾಖ್ಣೊನಿ. ಕತೋಬಿ ಆ ಹೈರುತೆ ಖ್ವಾಜು. ಪಾಲ್ಟೊಲಿ ಬಾರೇಮ ಭೈಕಿಜೈನ್, ಮಾರೇಧಿ ಹುವಾಯೆತ್ರೆ ಖ್ವಾಮೆ ಹುವಾಸ್ತೆ ಇನ ಧರಿಲ್ಯವಾನ ಖ್ವಾಜೆ ಮಿಲವ್‌ಕರುಸ್.

14 ಕ್ರಿಸ್ತ ಯೇಸುಮ ದೇವ್ ಮಹಾನ್ ಬುಲಾವ್ಣಿಖ್ವಾಜೆ ಇನಾಮ್ ಲೇವ್ಣುಕರಿ ಶುಶತ್ ಭಾಂದಿನ್ ನಾಖ್ವುಕರೂಸ್.

15 ಅಪ್ಪಾಮ ಪುರ್ಗುಲ್ ಹುಯಿರ್ದಿವಾಳ ಖ್ವಾರ್‌ಸ್ ಭಣ ಆ ಬಾರೇಮ ಪೂರ ಹುಯಿರ್ದಿವ್ಣು ಅಜು ಖಿವುತೋಬಿ ಏಕ್ ವಾತೆವ್ ತುಮೆ ಅಲಕ್ ಸೋಚ್‌ವಾಳ ಹುಯಿರ್ದಿವೊ ಇನ ದೇವ್ ತುಮುನ ವತಾಳಿ ದಿಶೆ.

16 ರ್ಲೀನ್‌ಬಿ, ಅಪ್ಲೆ ಖಿವಿ ರೀತಿಮ ಚಾಲಿನ್ ಅತ್ರೆಲಗು ಐರ್ದ್ಲಿ ಇಮ್ಮುಸ್ ಚಾಲಿಯೇ.

17 ಭೇನೆ ಬೈಯೇವೊ, ತುಮೆ ಅಖ್ಲು ಮಾರಿ ಜೋಡೆ ಮಳಿನ್ ಮಾರಿಜೋಡೇಡಿ ಚಾಲವಾಳ ಹುಯಿರ್ದೆವೊ ಅಜ್ಜು ಕೋಣ್ ಬರೊಬರ್ದೆ ಪರಕ್ಮ ಚಾಲಸ್ಕಿ ಇನ ಖ್ವಯಾಲ್ಮಲೀಲೆವೊ.

18 ಶನಕತೊ ಕೈಯೆಕ್ಕಿ ಜಣು ಕ್ರಿಸ್ತನಿ ಶಿಲ್‌ಬೇನ ವಿರೋದಿ ಹುಯಿನ್ ಚಾಲಸ್. ಇವ್ಣಿ ಬಾರೇಮ ತುಮುನ ಕೆತ್ರಿಕ್ಕಿಹಲ್ಲ ಬೋಲ್ಯೊ ಹಮ್ಮೇಬಿ ರೊಯಿನ್ ಬೋಲುಕರುಸ್.

19 ಪೇಟೆಸ್ ಇವ್ಣು ದೇವ್, ಖ್ವರಮ್‌ಕಾಡಾನು ಕಾಮಸ್ ಇವ್ಣುನ ಮರ್ಯಾದಿನು. ಇವ್ಣೆ ಜಗತ್ತಿ ಬಾರೇಮಸ್ ಸೋಚವಾಳು, ಅನಖ್ವಾಜೆ ವಿನಾಶಧೀಸ್ ಇವ್ಣೆ ಖ್ವರ್ತಿಲುಷೆ.

20 ಅಪ್ಪೆತೋಬಿ ಸೊರ್ಗಾನ ಪ್ರಜೆ ಹುಯಿರಾಸ್, ಅಪ್ಪೊ ಬಚಾಡವಾಳೊ ಪ್ರಭು ಯೇಸು ಕ್ರಿಸ್ತಸ್ ಹಿಜ್ಜಾಥೊ ಆವಾನು ಮ್ಹೋರೆ ದೇಖುಕರೆಸ್.

21 ಯೊ ಅಖ್ವಾಸ್ತು ಇನ ಅಧೀನ್‌ಮ ಲೀನ್ ತಾಖತ್‌ವಾಳೊ ಹುಯಿನ್ ಅಪ್ಪ ಕಮ್‌ಜೋರ್ ಶರೀರ್‌ನ ಇನಿ ಮಹಿಮೆಧಿ ಭರ್ಯೆರ್ದಾವನು ಶರೀರ್ದೆತರ ಬದ್ಲಾವ್‌ಷೆ.

4

ಮಾಲುಮ್ ಕರಾನು

1 ಅಮರ್ತ್ವವಾಪರ್, ಮಾರ ಪ್ಯಾರ್‌ನ ಭೇನೆ ಬೈಯೇವೊ ಅಜ್ಜು ಸಾಧಿವೊ, ಮನ ಶಂತೋಖ್ವಾಬಿ ಕಿರಿಟೆಬಿ ಹುಯಿರ್ದೆವವಾಳವೊ, ಮೇ ಬೋಲಾನಿತರ ಪ್ರಭುಮ ಘಟ್‌ಧಿ ಭೀರ್ದೆವೊ.

2 ಪ್ರಭುಮ ಏಕ್ ದಿಲ್‌ವಾಳ ಹುಯಿರ್ದೆವೊಕರಿ ಯುವೊದ್ಯನಾಬಿ ಸಂತುಕೆನ ಗಿಂಗೈಲೆವುಸ್.

3 ಮಾರೊ ಖ್ವಾಚೊ ಸಾಧಿನೊ ಸೇವಕ್, ಯೊ ತಯೇಡಾವ್ವ ಮದತ್ ಹುಯಿರ್ದೆವ್ವುಕರಿ ತುನ ಬೋಲಿಲೆವುಸ್. ಇವ್ಣೆ ಜಿನು ಕ್ಲೇಮೆನ್ಸ್ ಅಜ್ಜು ಥೋಡ ಜೋಡ್‌ಕಾಮ್ ಕರವಾಳನ ಖ್ವಮೇದ್ ಮಾರ ಜೋಡೆ ಸುವಾರ್ತೆನಖ್ವಾಜೆ ಖ್ವತ್ಯು ಅವ್ಣು ನಾಮ್‌ಅಖ್ಲು ಜಾನ್ನ್ ಹಕ್‌ವಾಳಾನಿ ಪಟ್ಟಿಮ ಛಾ.

4 ಕೆದೇಬಿ ಪ್ರಭುಮ ಖುಷಿಕರೊ, ಖುಷಿಲೀಲೆವೊಕರಿ ಪಾಲ್ಟೊ ಬೋಲುಸ್.

5 ತುಮಾರು ಖ್ವಮಾಳಿರ್ದವಾನುಬಿ, ಗೋರ್‌ಬಿ ಹರೇಕ್ ಅದ್ಮಿನಾಬಿ ಮಾಲುಮ್‌ಪಡಾದೆ, ಪ್ರಭು ಪಾಲ್ಟು ಆವಾನು ಲಗಾಬಗು ಹುಯಿಗು.

6 ಖಿವಿ ಬಾರೇಮಾಬಿ ವೇಚ್‌ಣೆ ನಾಕರ್ದತೆ ಅಖ್ವೀಸ್ ವಿಚಾರ್‌ಮ ದೇವ್‌ಖ್ವಮ್ವೆಧನ್ಯವಾದ್ನು ಪ್ರಾರ್ಥನೆಬಿ ಬಿಂತಿ ಕರ್ತಹುಯಿನ್ ತುಮುನ ಹೋಣುತೆಯಿನ ಪ್ರಭುನ ಖ್ವಮ್‌ಜಾಡೊ.

7 ಅಜ್ಜು ತದೆ ಅದ್ಮಿನ ಖ್ವಯಾಲ್‌ಥೀಬಿ ಭಡಿರ್ದವಾನು ದೇವ್ವಿ ಶಾಂತಿ ತುಮಾರ ದಿಲ್‌ನಾಬಿ ಸೋಚ್‌ನಾಬಿ ಕ್ರಿಸ್ತ ಯೇಸುಮ ಬಚ್ಚಾಡ್‌ಶೆ.

8 ಕಡೇಶಿಮ ಮಾರ ಭೇನೆ ಭೈಯೇವೊ, ಖಿವು ಖ್ವಾಚುಕಿ, ನ್ಯಾಪ್‌ನೂಕಿ, ಗಣ್ತಿನುಕಿ, ಪಾಕ್‌ನೂಕಿ, ಲಾಡ್ನೂಬಿ, ಖ್ವಾಜ್‌ನುಬಿ ಹುಯಿರ್ದಸ್ವಿ, ಖಿವು ಅಲ್ಪಿ ಚಾಲ್‌ಚಲಣ್‌ಬಿ, ಕೀರತ್ನ ಲ್ವಾಯೇಕ್ಕಿ, ಯೊ ಅಖ್ವಾನಿ ಬಾರೇಮ ಸೋಚಾವಳ ಹುಯಿರ್ದವೊ.

9 ತುಮೆ ಖಿವು ಮಾರೇಥಿ ಶಿಕಿ ಲೀರಾಖ್ಯಾಸ್ವಿ, ಅಜ್ಜು ಖಿವು ಮಾರಾಮ ಖ್ವಮ್‌ಜಿ ದೇಖಿರಾಖ್ಯಾಸ್ವಿ ಇನಾಸ್ ಕರ್ತಆವೊ. ಅಮ್ ಕರ್ಯಾತೊ ಸಮಾಧಾನೊ ದೇವ್ ತುಮಾರ ಜೋಡೆರ್ದಿಷೆ.

ಇನಾಮ್‌ಖ್ವಾಜೆ ಧನ್ಯವಾದ್

10 ಮಾರಿ ಬಾರೇಮ ತುಮುನ ಛಾತೆ ಖ್ವದ್ದರ್ ಅತ್ರದನ್ ಪಾರ್ ಚಿಗುರ್ ಮ್ಹೇಲ್ಯತೆ ಇನಾಮ್‌ಜೆ ಮೇ ಪ್ರಭುಮ ಖುಷಿಕರುಸ್. ಅಥ್ವಾನಿ ಸೋಚ್ ತುಮಾರಮ ಆ ಪಹಿಲೆ ರ್ದಿಯುಹೊತ್ತೊಬಿ, ಮದತ್ ಕರಾನ ಬರೊಬರ್ದಿ ವೇಳ್ ಕೊಆಯಿರ್ದಿಣೀನಿ.

11 ಮನ ಹೋಣುತೆ ಇನಿ ಬಾರೇಥಿ ಮೇ ಅನ ಕೋ ಬೋಲುಕರುನಿ, ಮೆ ಬೋಲ್ವುಕತೊ ಛಾತೆ ಪರಕ್ಮ ಹಕ್ಲಾಲ್‌ಥಿ ರ್ದವಾನು ಶಿಕಿರಾಖ್ಯಾಸ್.

12 ಗರೀಬ್ ಹುಯಿರ್ದವಾನಬಿ ಮಾಲುಮ್ ಚೆಹಳ್‌ಥಿರ್ದವಾನು ಮಾಲುಮ್. ಮೆ ಹಕ್ಲಾಲ್‌ಥಿ ರ್ದಯೊತೋಬಿ, ಭುಕ್ಯೊರ್ದಯೊತೋಬಿ, ಬರ್ಗತ್‌ವಾಳೊ ಹುಯುತೋಬಿ, ಕಾಯಸ್‌ಕೊಂತೆ ಹುಯೋತೋಬಿ,

ಖಿವಿ ರ್ವಾಮರ್ದವಾಳೊ ರ್ವಿಯೊತೋಬಿ ಇನು ಗಪ್ಲತ್ ಮನ ಮಾಲುಮ್.

13 ಮನ ತಾಖತ್ ದ್ಯವಾಳೊ ಕ್ರಿಸ್ತಧಿ ಮೆ ಅಖ್ಯಾಸ್ನ ಕರಾನ ಶಕತ್‌ವಾಳೊ ಹುಯಿರೋಸ್.

14 ಅಮ್ ರ್ವಿಯುತೋಬಿ ತುಮೆ ಮಾರಿ ಖ್ವತಾಪ್ಪಿ ಖ್ವಂಗೆಮಥಾತೆ ಅಱ್ಱುಹುಯು.

15 ಅಜ್ಜು ಫಿಲಿಪ್ಪಿವಾಳೊ, ಮೇ ಶುರುವಾತ್ನ ತುಮಾರಮ ಸುವಾರ್ತೆನ ಪ್ರಚಾರ್ ಕರೀನ್, ಮೆಕೆದೋನ್ಯನ ಗಯೋತೆ ತದೆ ದ್ಯವಾನು, ಲ್ಯಾವಾನಿ ಬಾರೇಮ ತುಮುನ ಮ್ಹೇಲ್ಯೂತೊ ಬಿಜ್ಜು ಖಿವು ಸಬೇಬಿ ಮನ ಮದತ್ ಕೊದಿದೂನಿಕರಿ ತುಮುನಾಬಿ ಮಾಲುಮ್ ಛಾ.

16 ಮೇ ಥೆಸಲೋನಿಕಮ ಥೋತೆ ತದೇಬಿ ತುಮೆ ಏಕ್ ಬೇಹಲ್ಲ ಮಾರಿ ಜರೂರತ್ವಾಜೆ ಮದತ್ ದಿಮೋಕ್‌ಲ್ಯಥಾನಿ.

17 ಖ್ವಾಚಮಾಬಿ ಮೆ ತುಮಾರೇಥಿ ಇನಾಮ್ ಲೇವ್ಣು ಕರಿಕಾಹೆ, ಕತೋಬಿ ಅನೇಥಿ ತುಮೆ ಚೆಹಳ್ ಅಜ್ಜು ಬರ್ಗತ್ ಹುವಾದೇಸ್ ಕರಿ ಮಾರಿ ಆಖ್ವ್.

18 ಹೋಣುತೆ ಅಖ್ಬೂಸ್ ಮನ ಛಾ, ಚೆಹಳ್ ಹುಯಿರ್ರೋಸ್. ಎಪಫ್ರೋದೀತ್‌ನ ತುಮೆ ದೀನ್ ಮೋಕ್‌ಲ್ಯಾತೆ ಇನಾಮ್ ಮನ ಪೋಚಾನಿ ವಖ್ತೆ ಮೆ ಭರೈನ್ ಚೆಹಳ್‌ವಾಳೊ ಹುಯಿರ್ರೋಸ್. ಯೊ ತುಮಾರು ಕಾಣಕೆ ದೇವ್ನ ಥಪ್ಕಾರ್ನ್ ವಾ ಹುಯಿರ್ರೋಸ್, ಯೊ ದೇವ್ನ ಲ್ಹಾಯಕ್‌ನು ಬಲಿ ಹುಯಿರ್ರೋಸ್.

19 ಮಾರೊ ದೇವ್ ಕ್ರಿಸ್ತ ಯೇಸುಧಿ ಇನಿ ಮೋಟಿ ಮಹಿಮೆನ ಧನ್‌ದಾಲಿಡ್ಲಿ ತುಮುನ ಛಾತೆ ಹರೇಕ್ ಜರೂರತ್‌ನ ಪೂರ ಕರ್ಶೆ.

20 ಅಪ್ಪ ಬಾ ಹುಯಿರ್ರೋತೆ ದೇವ್ನ ಜಗ್‌ಜಮಾನಮಾಬಿ ಮಹಿಮೆ ಹುವಾದೆ! ಆಮೆನ್.

ಖ್ವರ್ತಿನಿ ಖ್ವಲಾಮ್

21 ಕ್ರಿಸ್ತ ಯೇಸುಮ ಛಾತೆ ಹರೇಕ್ ವಿಶ್ವಾಸಿನಬಿ ಮಾರಿ ಖ್ವಲಾಮ್ ಬೋಲೊ. ಮಾರ ಜೋಡ್ತ ಛಾತೆ ಭೈಯೇ ಭೇನೆಬಿ ತುಮುನ ಖ್ವಲಾಮ್ ಕರುಕರಸ್.

22 ಹಜ್ಜಾ ಛಾತೆ ದೇವ್ನು ವಿಶ್ವಾಸಿ ಖ್ವಾರು ತುಮುನ ಖ್ವಲಾಮ್ ಕರುಕರಸ್. ವಿಶೇಷ್‌ಥಿ ಕೈಸರ್‌ನು ಮಹೇಲ್‌ಮ ರ್ವಾಳುಬಿ ತುಮುನ ಖ್ವಲಾಮ್ ಬೋಲಿರಾಘ್ಯಸ್.

23 ಪ್ರಭು ಯೇಸು ಕ್ರಿಸ್ತನು ವಾರ್‌ಖ್ವೊ ತುಮಾರ ಆತ್ಮನಿ ಜೋಡೆ ರ್ವಾದೆ.

ದೇವ್ಲಿ ಖಾಚಿ ವಚನ್
The New Testament in the Vaagri Booli language of
India: ದೇವ್ಲಿ ಖಾಚಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವ್ಲಿ ಖಾಚಿ ವಚನ್
ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06